

文集

卷二

卷三

二開

薛文清公全書

敬軒薛先生文集卷之二



門人關西張鼎校正編輯
鄉後學沁水張銓重校梓

古詩 歌

穆陵關夜雨

暝色來遠谷清風動華燭山樓雨聲寒羅帷人獨宿

山行二首

山鳥多清音山花有異香但得山間趣寧辭山路長

又

荒岡斷復連風葉散還集霜落秋澗清烟橫晚岫碧

作息吟

向晚群動息向曉羣動作群動作息間乃是先天學
東平行臺有竹翳於惡木荒草命僕芟治嘉植
乃遂詩以紀之

生平苦愛竹義若君子交茲軒忽見之俄頃漆在膠
振衣步其下周覽增鬱陶惡木一何多蔓草一何饒
翳此破苔筍撓彼凌雲梢命僕恣前剪伐得辭斤斧勞
除惡貴絕本蘊崇及溝壕荒穢既了了涼風亦蕭蕭
修莖遂生植嘉蔭愜遊遨作詩紀顛末庶為同心謠

穆陵關

危哉穆陵關高出衆山頂地勢愈覺寬天宇相迴迫
林木何蕭森首夏風色冷山樓試一登眺覽恣遐騁
沂岱環西陰淮海接南嶺齊州走北川扶桑控東影
道里會一門山川挈要領緬思千古前豪伯互吞并
齊履空復然秦蚕已侵境干戈被長巒生民困魚鼎
于今天道旋四夷守安靜山行晝落然水宿夜無警
顧我觀風人符節得屢秉作詩紀茲行傳與山將永

蘭陵懷古

早發郟子國午至蘭陵邑蘭陵久已荒禾黍帶荆棘
惟有古寺存逕入林影密老僧知我來出門遠候立

下馬問往事為我指遺跡蒼茫古城東墓有荀卿石
我欲往尋之還為野水隔憶昔周室卑蠻荆凌上國
茲邑乃其疆人物殊烜赫寂寞千載餘浮雲空古色
如何當日賢重有逃讒責只今文字存尚為人指摘
鞭馬舍之去極目遠天碧

敬吟

人惟肖天地亦具天地性性無物不存存性惟一敬
心敬體不偏情敬發必中頭敬形端直鼻敬氣肅靜
目敬無邪視耳敬無妄聽口敬不妄言身敬不妄動
手敬容必恭足敬容必重瞬息敬存身早作敬致用

致用在天倫天倫敬斯定夫敬必先義婦敬必從令
子敬孝必隆父敬恩必盛臣敬百職脩君敬萬邦靖
兄敬篤其愛弟敬謹其行朋友以敬交然諾必重應
敬則倫理明不敬百行病仰惟古聖人一敬更相命
堯欽帝之宗舜恭明兩竝祗台念禹德日躋有湯聖
文王安敬止武王勉敬勝篤敬傳孔業敬德著周政
敬惟群聖樞大訓迭輝映下逮河洛儒紹統開迷逕
整肅嚴隄防主一謹操柄惺惺不昏昧收斂無餘剩
用力在斯須百體孰敢橫聖途漸可登聖言良可證
一敬苟不存萬欲皆奔縱身心墜卑污綱常滅天正

禽獸將同歸人類孰與共噫嘻敬息間狂聖越天阱
法言述聖謨匪日小子佞

送楊叅議三首

白露下將夕天宇生涼風之子有所適告别何匆匆
群公盡祖送飛蓋凌長空停驂灤水曲列宴歷亭中
秋容澹觴酌高風急絲桐酒盡儼將發班馬何玲瓏
行當釋塵鞅還應掛飛蓬大江轉吳楚重山入天叢
錦城有佳色浣溪有遺踪訪古遂舒嘯觀風足從容
坐令全蜀俗解與鄒魯同茲遊豈云易兩情若為通
翹首遲歸鴈應是春花紅

右分韻得紅字

林木生涼颺臯蘭被清露念子三川行正值九秋暮
天空一鴈翔江遠孤舟鶩旬宣有佳興載詠甘棠句
右分韻得露字

岷江瀉東溟岷山倚西極江山古名秀楊君將此適
秋風送征帆夜火明水驛相憶瑤華音看取東飛翼
右分韻得驛字

木友鶴軒

九臯阻且深潔白有佳鳥中宵忽長鳴清響徹四表
開軒一聽之衆理悉明了蜂蛤藏洪淵秀氣浮浩漭

良璞在崑岡清輝散岩嶹雅興與與茲同至德潛且皎
溫溫聖者懷大道思遠紹友鶴名華軒存誠絕外擾
水積成川流木壅盛顛杪功深効豈微響大聲不小
慙非風雅才作詩心自慄

冬夜懷魏希文

希文名純山東萊州府
高密人時謫戍玉田

冬夜氣何厲米雪輝前楹單居不能寐懷我舊友生
行雲去不息賓鴻各時征兩情曠難合欲語誰當聽
惟有寒月光見子心宇清展轉遂至旦遠思徒營營
余既作此詩至來年三月間有党厚本者關中士
人也先任教職又為縣令後謫戎伍間復膺薦授

荆門州幕職道過滎邑党先與余有故因復問之
始知吾友希文亦以薦至京師未及試用而死矣
及考其死之冬適余作詩時也嗚呼希文純古君
子將謂其不終老於草萊也而乃竟止於斯豈非
命歟且余作詩時適與其卒時又相先後亦豈非
平昔交遊之深默有所感歟嗚呼已矣時宣德二
年春三月河東薛瑄識

答仰宗岱寺丞見貽韻

念子青雲器早涉青雲路行行捧德音
矐言省民務風俗廣咨詢幽隱亟告訴
來為人所悅去為人所慕

皇澤一以敷郡國足膏澍况復崇文儒士林喜披霧
心涵玉壺冰氣裊金莖露懷哉明盛時展矣風雲
遇而我同官良惟子荷與顧通籍來旬宣各自植嘉
譽獨有蘭臭言祇以同心故還膺篤忠良更此寫中
素何當展良覲相期在秋暮

題陳希夷圖

三峰亦何峻白雲亦何多中有高世士冥栖掩松蘿
石泉漱寒玉好鳥間清歌歌長一披拂紅紫爭紛羅
山隔五季塵年頽萬里波豈無經濟策肥遯矣靡他
威鳳不浪集冥鴻難重過清心探化機瞑目養天和
真息深在踵利貞靜不訛只疑龍蛇蟄不管歲月梭
我欲昇玉井濯手攀嵯峨扣關起公語妙理應如何
欲去還自休馬圖今在河

永慕堂為楊大叅賦

大化運不息逝水無停時依依舊居室惻愴中腸悲
書殘讀遺編機有餘斷絲班衣不再舞壽觴寧重持
庭前百卉芳但覺陰陽移儀容切寤寐恍惚如見之
親心我所安親志我所期心志著且存大節矢靡虧
悠哉孝子情最此終天思

遊禹門禹廟在焉

春澤周四野閑情樂時和出郊縱逸興緬懷佳山河
禹門忽在望峭壁雲嵯峨石磴接飛棧危樓架洪波
空山響絲竹虛堂進舞歌父老誠苦心旨酒神所呵
由來非一朝吾意其如何

河汾五賢詠五首

卜子夏

浩浩西河流遙遙東魯山山河遠相隔千里獨遊還
升堂奧可入豈曰文辭觀相從陳蔡危松栢知天寒
索居晚歸來侯國師甘盤去之幾千載高風灑塵寰
瞻望不可及青雲映西關

段干木

冥鴻不受弋神龍不可羈所以高世士孤情薄雲霓
矯矯段干木志節一何奇珪組豈其願軒冕不吾希
踰垣猶弗見况乃趨走之豈徒侯國尊凜為百世師

文中子

古人不可見古俗寧復淳依依萬春鄉踈屬連清汾
良時曠莫與鳴鳥寂不聞悠悠禮樂志終與麋鹿群
頽波逝東極寒雲滿西津惜哉經世言淆雜多蕪榛
時無伊川子此意將誰論

太史公

愛有所見忘忠有所見疑古來非一朝人道每如茲
悠悠太史公言論適有期謂心情可白寧知事參差
奇文雖自解驟驥諒難追巷伯彼何人千載存其詩

東臯子

人仕為其名子仕獨為酒一斗衆所稱五斗吾自取
猶嫌酒未足棄官歸隴畝葛巾耕東臯烟雨牛一耦
種黍學陶翁自釀還給口沉飲得真味萬事亦何有
清風千載餘誰復尚能友

古詩

天地常不沒山河鎮如斯惟有人與物代謝無停時
因過咸秦境周覽生悲思渭水自縈帶南山亦參差
茲惟帝王宅自古稱雄奇當時宮闕壯摩霄切雲霓
千門與萬戶珠簾錦綉帷一朝時事去掃地無復遺
城市盡為墟麥秀草離離亦有英雄軍干戈互相持
慷慨爭土疆終老志不衰只今但丘塚名姓寧可知
京都足妖治高門富姜姬綽約姑射仙鬢髮冰雪肌
只今化為土况乃粉黛施休明盛文物旂常畫蛇龜
千乘及萬騎雜還相追隨將相立軒冕聲樂奏英池
繁華有萬端一去不可追俯仰千古事有若夢幻為
往者既已然將來復如之寄語執迷子當以理自推

浩歎

浩歎復浩歎寧知親眼見相彼天雨雪必有先集霰
蟻穴不知防鯨波今汗漫君子慮兢危小人尚欺誕
已矣無與言歸去畊吾畔

瀘川古意

三蜀古名郡瀘川古名州我來值殘暑偶此數日留
新秋忽改節涼風漸颼颼道遙散前除仰視天宇周
征鳥去不息白雲亦悠悠佳人渺何許重林蔽層丘
秋日復西邁大江自東流良辰不我與古道曠莫酬
願聞瑤華音行矣旋吾輜

五盤山

五盤何艱哉石磴繞山腹詰屈入雲霞回互下崖谷
嗟彼遠道人陟降勞筋骨跋馬登層巔悠然注遠目
惟見山色高似覺地勢促蜀道古艱險茲險甲西蜀
憶我去春來山山正芬馥今夏喜北歸四月暑未燠
茲山得再過頗快登覽欲前驛望黃壩蒼蒼但雲木
登金牛驛樓

好山四巖崑漢水前縈繞小樓試一登山水青未了
因思大禹時洪流方浩渺乃竭胼胝勞神功彌八表
岷山在經紀岷江亦疏導貢賦分九州梁州已通道

世傳金牛誕曾不細搜討山驛賦短章將為愚者曉
七盤道中

曉度七盤山北行道彌惡峭壁根虛無危棧架飛閣
飄飄風吹衣漠漠雲漲壑下有黑龍江亂石何磊落
急瀨轉雷轂奔湍散流沫洄潭更陰沉俯視誠可愕
茲路屬再來即事情已昨艱險難具論惟與存顛末

褒斜道中

褒斜一何長深谷自迤邐雲木青無邊群峰各峻峙
鳥道緣崖巔危棧架江涘冥冥叫子規決決響溪水
累日山峽中陟降亦勞只古來蜀道難此道難莫擬

自我入蜀門今已一年矣既乏督辦能兼負素餐恥
而况髣髴蒼胡寧不知止上章乞解綬詔許感不已
雖云此谷險且遂北歸喜行色宣柔毫庶用傳孫子

遠道

遠道復遠道驅馳何草草及歸已踰年白髮添不少
入門悼先亡痛哭傷懷抱子婦共號咷百感相煎燭
拭淚問里閭嘆逝驚莫保衰殺誰使然矯首問蒼昊
從此甘息機田野安吾老

孟城驛雪中詠

高沙有候館闌檻殊幽清檻內足凡木凋萎不可名

獨彼凌雲竹，爵有冒雪青。飄蕭散寒葉，脩直搖蒼莖。
靈籟奏清響，鏘若金石鳴。晴霄吐華月，流影亂虛明。
賞翫竟朝夕，似當西南朋。乃知歲寒操，匪獨松柏貞。
失心又不如，愧我為物靈。

徐州洪

亂石何巉岩，長堤更宛轉。狹岸忽陡起，急瀨如注坂。
回旋聚流沫，駭浪灑雪霰。舟行良已難，下上勞拽挽。
翻思遊川峽，江石尤險遠。瞿塘十二灘，波浪激雷電。
迴視過茲洪，反若歷平坦。乃知所觀大小者，不掛眼。

淮南謳

淮土何漫漫，淮水自悠悠。小山去已久，桂樹遺岩幽。
昔有學仙子，意欲仍丹丘。秋石既烹煉，鴻寶亦藏收。
鷄犬竟莫聞，行雲去難留。寧慮時事異，翻結千古愁。
舞榭荆棘生，歌臺麋鹿遊。信知希世事，伊豈望外求。
揖讓有堯舜，高風想巢由。此道久已非，聽我淮南謳。

高郵冰泮發舟

晚泊高郵城，雨雪竟連日。念彼役人勞，寓此孟城驛。
扁舟候晴發，河水復鱗積。因之累宿留，令我心悵悵。
忽報寒江解，喜泛春流碧。直過大江東，此地成追憶。

冰解舟發

春水渙然釋春流復溶溶解纜孟城驛百尺牽東風
連翩大舸來峨峨掛飛蓬登艫恣春覽烟華正濛濛
澤國曠無際重湖渺難窮漸覺高郵北行及廣陵東
所過足清眺舟人莫怱怱

出自城北門

出自城北門周覽快心目峨峨鍾阜青漫漫平湖綠
水依長堤茂樹隱芳洲曲縹緲天際樓高下林間屋
遙遙江上山連連遠岫出江山自雄奇 帝里在經
復佳麗從古然嘉氣方蔥鬱官署何巖巖列宇面山
麓偶茲吏隱兼頗遂蕭散欲超哉復超哉白雲自相

逐

晚翠亭為張司徒作

花木何紛然各競芳菲時一夕下霜霰憔悴無故姿
嚴嚴司徒府後圃殊遲迤而於歲寒日挺此萬竹枝
群芳盡搖落茲物獨見奇密葉既不凋勁節亦不移
一逕入深處橫橋夾清池池亭晝虛敞宴坐生寒颼
清影落四簷靜與秀色宜適契君子節貞固老不衰
為取亭中琴絃我晚翠詩

澹菴卷為謝侍郎乃兄題

閩山何岩堯閩水亦清泚中有肥遁人雅志丘壑美

山田入雲耕結屋傍流水耕稼有餘閑琴書時復理
寄興槁梧中游心竹素裏庭戶無囂塵外物絕珍綺
疏食足充餐絺布良適體朋來無雜言談道而已矣
至樂旣無假浮榮焉足擬所以忘歲年足不至州里
白雲在高丘鳴鶴在中沚安得躡輕風一訪澹菴子

擬古 四十一首

天地形之大陰陽氣之尊伊誰知此物來自無極門
清濁旣莫離動靜互為根大化去不息至理亦長存
彼哉虛寂子已矣無復論

悠悠復悠悠水中有行舟四序無淹畧代謝不可留
春鳥寂無聲寒蟬號素秋落葉滿阡陌白雲散岩幽
去去莫復道潁陽有遺老

庭前桂花發清香散涼颼采采黃金英傾筐方自持
思欲贈遠人風波阻長岐望望不可及馨潔空自奇
吾思古聖心迥出八紘表天理為之大人世為之小
堯虞禹相授杯水拱揖了終古駭其事未足稱達道
四時一何神變化不可測陰陽旣交代星辰遞羅列
孰其主宰之終古不差忒聖人秉明靈動息有貞則
吾慕魯中叟矢志心以學易

端居憶遠遊路經首陽山山有二賢祠青松蔭重關

斯人難再得守餓心獨安清風激頽俗高義越人寰
去之幾千載可慕不可攀

騶虞獸之瑞麒麟獸之仁物性尚不殺而况形為人
夫何周轍東王道久已湮孫吳騁狙詐申商號無恩
流毒劇洪水遺黎苦漂淪強羸滅諸國三戶亡咸秦
天道信反覆永為來世陳

聖治奠九有禹跡亦茫茫王澤既饒洽彝倫復昭彰
以茲熙皞世舉俗躋樂康胡為古道非極意開邊荒
征行苦鋒鏑飛輓失耕桑民生既騷屑天和亦乖傷
廣土竟何益不救危與亡茲事已千載雄豪有秦皇

荆山有美璞巴蜀多名材此物信為奇攻治亦難哉
匠石得其良寶就成層臺胡為用匪人坐此斲削乖
既自王之玷還為木之災而况上天工理代必汝諧
鍊覆良可慮棟撓諒難陪所以虞周聖登庸必賢材
湖邊多楊柳山上多松栢松栢存正性不改青青色
楊柳易為春隨風發枝節二月絲垂金三月絮飛雪
紛紛冶遊子賞翫不知歇松栢寂無言枝幹獨挺特
空以木自奇不為時所悅請看霜霰餘榮悴居然別
時來行堤上春氣薰人心宛轉湖山曲隱映花樹林
芊綿草抽綠蒙茸柳垂金鳴鳥何間關織鱗或浮沉

生物方總總大化亦駸駸當時浴沂者樂意不可尋
混沌鴻濛中伊誰作主尸洪河出龍馬清洛浮神龜
有文粲以別實惟天所為悟彼陰與陽契此偶將奇
大聖發深智運意畫兩儀生生之謂易變化無崖涯
宇宙豈云大彌綸靡有遺如何千載餘圖象闕莫知
卓哉弄鬼子探源溯希夷從茲識姬孔還應見伏羲
伊閩有遺編學易真吾師

又

灼灼春庭樹開花漸離披因思唐虞世日方亭午時
大禹亦神聖兢兢為保持如何百代下此道久已衰

豈亨王格之請看太易辭

木腐虫蠹出氣乖朮贅生曜靈一薄蝕陰曠鬱然興
道術裂周季縱橫亂秦嬴青牛既夙駕白馬亦時征
汜濫自涓滴熇赫兆星星多謝宋諸老萬古開昏冥
如何陽光發尚自爝火明寄語行路人勿迷棘與荆
萋萋湖邊草榮榮山上花山中有高士探化心靡他
天地自橐籥萬物從交加深居不窺牖四海皆森羅
我欲見其人捫蘿陟山阿山阿忽回合冥蒙起煙霞
至道復誰語柰此高士何
大虛浩無際何所立天堂坤厚大氣舉地獄置何方

此理亦昭哉妄見胡冥范萬世為之惑福果僥難量
高標拔地起飛宇就天翔搏刻土木梗鎔劑金銀粧
人力為殫竭財物亦耗傷既自息吹乖馬得寒暑常
茲事自前季滔天勢彌張反經如可作與言討彼狂
圓象無停運大化不可留征車既西邁行舟復東流
轍跡苦相背兩美馬得有青松生澗底白日麗高丘
餘光不迴照真榦空蕭颺去去莫復道零露滿春草
五陵多俠客三輔足貴豪園池占佳勝高第干雲霄
不惜千金重雅意一日遨綺筵饌水陸清歌間笙匏
酒酣視天地泰山一鴻毛中情既昏惑外體亦勞焦
誰似林居于神理恒超超

在陰鶴相應遷喬鳥當歌琴書滿瑤席良朋亦已多
各愛芳菲時共借光陰過齊心何所求所求保太和
壯年不努力柰此老大何

白雲在高丘綠蘿在深谷中有冥棲士雲蘿蔽茅屋
獨抱尚友情緬遂碩人軸古琴時復彈古書還更讀
逍遙無外事俯仰長自足沮溺耕在野姜叟釣渭曲
伊人豈無心恥銜荆山玉將須鳳來儀朝陽滿梧竹
庭前雙榴樹葉密枝相交時當四五月吐花紅夭夭
人愛花爛熳我愛花始苞堯夫有妙識造化滿即消

情知醕酖醉還見離披凋所以大聖人持盈不忘勞
吾今老學易看花遂成謠

虞帝尚欽恤大禹泣罪人所以聖者心天地同一仁
周政失其御侯章僭無倫芻靈既莫施作俑亦不聞
秦穆一朝逝殉以三良身臨穴殊慄慄仰天亦悲辛
古猶惜纍辜如何殺俊民王誅一以失流毒蕩無垠
驪山錮重泉銀海通幽津遂使三秦衆半作地下塵
天道本好還羸族亦沉淪因歌黃鳥詩重為仁者陳
迴觀自古來黃金世所急鄙鳩幾萬斤梁苑億千鎰
貪求刻人骨堆積盈家室寧知造化權隨時有消息
人無長盛年物無不散日金穴竟荒虛金谷亦空寂
發塚尚有儒胠篋豈無力長見聚金人終為大盜積
徠者既悠悠來者方役役旨哉莊生言獨無郢中質
蒿萊不招鳳梧桐不栖鷄物故各有趣高卑馬可齊
伯夷居東海呂望釣磻溪峨峨太行顛蒼蔚方朝躋
陽光燭四表發軔岐山西二老既云往婦子爭扶攜
固知賢聖人去就關崇卑試聽紫芝歌坐見羸道隳
王良稱善御時方尚詭遇季子洛陽歸張儀關中去
佩印誇鄉里驅車塞道路說合從與橫而取貴將富
孟軻陳王道反為迂闊誤已哉無復言遠矣悟王寤

文集卷之二
驪珠不易探至理不易論端木稱達者性道猶弗聞
五十知天命玄聖有遺言區區事末學役役勞其身
葩藻滅素質聲利迷心源有若亡羊客祇見岐路分
何當息冥升來復求其根

孤桐生龍門檠絲出東國相合為素琴不離君子側
清彈何悠揚遺音為發越中涵千古心養彼至人德
云胡變新聲絲竹半夷狄繁響難具論哇淫日淪惑
舉俗逐時好誰能稱在昔萬事亦復然不獨琴與瑟
吾思一氣大渾渾無邊方天機自流轉隨至互低昂
寒暑既代序日月亦運行庶物勃然出滿虛各有常

萬化定厥基終古為維綱大哉庖羲聖有畫粲以章
易道諒斯在請看陰與陽

吾思涑水翁志節一何高寒衾辭宥密視若秋鴻毛
古人不可作流俗正滔滔色過夏畦病意甚乞播勞
趨走信機巧苟得還驕豪閒詠青蠅詩載翫碩鼠爰
吾思魯公儀拔葵去織婦傳翼兩其足實惟天道故
云胡世君子大得兼小務生殖廣田園販鬻罔泉布
牙籌既自執龍斷復登顧彼哉何足言義利各有悟
蜩鳩笑大鵬夏虫疑寒冰語之斯道大心識何蒙冥
屬文篋笥滿讀書棟宇盈徒勞一生力了無寸見明

誰言點也狂鼓瑟有深情

月盈乃生魄陰極陽復來損餘補不足天道良昭扒
淳朴日溥散斯理亦何乖既剝猶未已豐亨尚增培
君子過佚樂小人窮之災所願均厥施九域登春臺
萬鍾固知富於性無加增千駟雖云衆難為身重輕
達人抱大觀不以外物嬰夷齊首陽餓伊摯莘野耕
清風激千古賢聖留其名邈哉務光讓鄙矣蝸角爭
蠅營徒為爾鴻飛自冥冥

青山何岩岩白雲自超超雲山日在望開門兩相高
既喜山靜止還愛雲飄飄秀色可攬結吾其陟山椒

大氣浩無涯厚地大氣舉形氣自依附人物乃中處
剛柔生變化陰陽行寒暑自古謂之然滿虛寧可數
吾思弄丸翁深情契斯語

丹轂既云飾翠蓋亦時張駟馬復在馭鸞和自鳴鏘
執綏者誰子升車氣揚揚迴旋逐水曲馳騁登周行
行人為之辟誰不羨輝光胡取覆餗誚而置郤鼎章
輪輿雖云美致寇安可量所以大易辭負乘著廢祥
洪荒日已遠文籍日以繁華偽滅真實汗漫迷本源
左氏已浮誇戰國皆詐言班馬揚其波蔚宗助其瀾
繼者如蝟毛美惡愛憎間諒非董狐筆盡信誠為難

誰哉法宣聖大典垂不刊
人生苦不足得隴更望蜀祖龍泛海行劉郎祀竈術
仙事俱茫茫百年竟飄忽汲汲復營營何時滿所欲
吾慕首陽翁清風在山谷

庭樹微飄落涼氣始披拂却憶少年時泛舟湖湘曲
秋風起波瀾寒霜下林麓日出江上楓霧隱楚岸竹
蘭芷亦蕭條芰荷不秋馥靈均舊遊處騷思方滿目
忽忽三十年涼意復相觸九歌有遺辭得意在雲谷
庭竹生涼颼明月從東上候虫草根鳴夜靜聲愈響
道遙步階除悠然起遐想三皇五帝時淳朴竟焉往

王風降忝離禮樂委榛莽反復千載間夷霸雜相長
是非垂不泯勝負在俯仰令人意難平撥置聊自廣
人巧千萬端莫逃造化巧三王行仁義子孫永相保
綿歷百千載順理得終考嬴隋南北朝竊國騁暴狡
社稷旋荒墟苗裔悉剪勦天巧必勝人人巧何足道

出金陵

金陵宿雨霽杲杲秋日明繆承 北闕召促裝出西
城追隨冠蓋集酌別臨江亭徘徊不能別去住難為
情掛席曉風發解纜早潮生抗手謝送者令人意難
平所願各努力令德崇端貞

平江行三首

石城上朝旭宿霧漸已收大江何茫茫柔櫓泛中流
鍾阜猶在望白雲散岩幽兩載寧無情湖山憶同遊
佳勝邈難即迴想空悠悠

順流駕長風掛席何快哉青山若相送兩岸猶崔嵬
恩召信光渥報稱知非才貞白有君子寧不動中懷
我舟旣云邁長風起層波天水共渺茫雲岫紛嵯峨
石城猶在望赤岸還經過遠堤秋樹小水國蒹葭多
老遂金陵遊柰此佳麗何北歸已陳跡江行遂成歌

過儀真

忽忽過儀真來往已三度茲行復祇召嚴程還北去
湖田收晚禾長堤落秋樹已遠金陵山漸近廣陵路
乘月宜舟行牽者且莫住

夜泊廣陵

夜到廣陵城已是三更後官舡少停泊驛吏勞奔走
風清月色明河漢粲星斗行思方搖搖懷古復何有

高郵

又見高郵城連延傍湖水水上紅驛樓登眺憶往歲
昔逢春雪飛今值秋風起歲華與人事迴換理如此
中貞諒自保期不愧行止

中負高郵湖

去年冒春雪楊帆過高郵今歲屬秋暮長風送我舟
湖心射日氣駭浪蹴天浮觀象卦有渙悟易情悠悠

淮陽稟古

淮陽古名郡卧治有昔賢禁闥不可留遺想增慨然
顧我豈其儔寵擢何連連本乏實德稱重為虛名牽
撫心益自愧懷人遂成篇

雨中渡淮

風雨渡長淮波浪何冥茫兩儀混不分恍若窺洪荒
舟人貪利涉片席就空翔翩翩入煙霧隨風任低昂
北岸泊水驛暮雨益淋浪且喜對官燭粲爛竟夕光

清河晚晴

向夕起長風秋雲靜天宇清波流月光白露下寒渚
榜人喜晴霽理楫夜相語早發過鍾吾漫漫見徐土

夜上呂梁洪

水村夜寥寥秋月流空白牽舟上呂梁逆浪湧寒雪
愧彼役夫勞當此灘水溢憶我四方遊江湖飽涉越
祇召復茲行恩重知才劣矢心復何如長洪石如鐵

過徐州

去年春正月南泛彭城舟今歲值秋暮北上溯長流

蹤跡信往復景物愜觀遊風寒堤柳落波減岸石稠
白見高城堞蒼蒼出遠山丘何處戲馬臺彷彿燕子樓
化遷無停軌事往不可求陳跡竟泯泯虛名但悠悠
覽今亦懷昔發聲遂成謳

送歐陽憲副

凜凜谷中風亭亭山上松風聲亦何勁松自無改容
競秀固妍好弱植徒豐茸獨於霜雪餘卓然見高蹤
悠悠四十年所遇多尚同歐陽信佳士一節抱始終
蒼蒼歲寒質展可為國庸適來述所職歸思何忽忽
載歌君子篇德期皓首崇

雜詩三首

洪荒一何遙悠悠幾萬載古跡竟茫然古道復安在
巍巍唐帝尊放勳薄四海文明啓中天倫典粲而藹
魯叟刪述勞于茲立聖軌寥落但陳編撫事增歎慨
孰云天地大形勢兩睽絕一氣周流之神理有昭格
雍雍虞庭臣穆穆賢聖德太和良在茲疇咨方未歇
所以祥鳳儀不獨大樂闕如何此道非千古空遺跡
山龍匪舜樂卑菲真禹心大哉虞夏聖憂民同一深
既服四載勞還彈五絃琴九功亦時敘勅天尚遺音
如何精一傳載往不可尋獨有簡冊光留照猶至今

西溪魚躍為樂安楊貢侍御題
西溪渺何許乃在揚林阿揚林古名族樂安世其家
家住溪水曲林木相交加地僻網罟絕溪邃遊魚多
澗澗聚弱藻洋洋戲新荷逆水微波生仰沫細雨斜
跳躍自有適出沒靜不譁楊族有名士考業咀英華
愛此魚性樂契彼道味嘉乃知天機妙萬象皆森羅
却鄙中散慢寧效濠梁誇緬懷旱麓詩載賦西溪歌
永言繼真躅勝景垂無涯

龍江曉望

兩岸青山隱隱一江白浪茫茫烟樹高低城郭風帆
遠近舟航

遣悶二首

客中鬱鬱不自得忽思古人讀古書古書古人亦如
此吾懷不放將何如

少時都不解憂喜壯年百慮攪我心我心默默向誰
說呼酒只對東風斟

臨清曲

臨清人家枕閘河臨清賈客何其多停舟落落無可
語呼酒只對長年歌

題墨牛二首

青松落陰石苔上雨餘百草芊綿長老叟牧牛牛性
馴牛背讀書與蕭爽書中之味深且長高睨盤古窺
皇唐日暮驅牛下山去風清月白天茫茫
綠楊芳草被平坡老人騎牛行且歌歌長扣角角欲
碎悠悠古意何其多布褐涼風生兩肘幾度歸來月
明後夜深遺響入青雲應有知音與携手

蚕婦吟

采葉者誰婦蓬首面不洗年年絲作人家衣短布裙
穿不揜體綺羅不是養蚕人三復斯言情不已

偶題

磊磊落落寒胸臆推蕩始覺心和平丈夫志量包宇
宙細故那得風波生

憶繡榮二孫

繡孫猶未識阿翁翁在山東一馬驄近別榮孫春又
夏相應學語問阿翁

歌歌

贈劉僉憲

古磬不諧人之耳古瑟不合人之心茫茫天地亦大
矣人生豈謂無知音陽春白雪聽者寡巴人下里和
如林退之奇崛篇子美爛熳吟謫仙逸氣隘六合一

字價抵千南金神遊八極不可見獨留文字幾千卷
江河萬古行地中飲者杯勺各滿願我生其後欲追
逐蹇若跛驚趨紫燕良馬東西南北流覽多公取古
詞各矜銜邇來忽遇劉虛菴胸中元氣何潭潭沉酣
百子索幽恠模鎔萬象窮川嵐興來落筆亦何壯一
日千里馳風帆又若秋溟露毫末明珠大貝相錯參
始悟古人今可學嗟我見晚生覲慙虛菴虛菴真奇
士磊落聲名固應爾相逢一曲伯牙琴高山峨峨水
清泚

茅屋漏

辛丑進士河汾客早向中州買居宅宅有茅屋八九
間補葺聊以蔽床蓆進士所好惟詩書衣食取足無
剩餘朝朝暮暮誦周孔行行坐坐歌唐虞以茲狂僻
誤生理老屋支撐幾星紀前月大風撮茅去今月久
雨漏不已移床徙榻那得乾堆書捲被空長嘆文章
不足補穿漏翻為兒女生覲顏豪家大屋足權咲已
覺紈袴輕儒冠却憶唐朝老工部西蜀草堂幾風雨
亦有官居鼎鼎尊欲起樓臺無處所昔賢窮達還復
然我何愠此霑濕苦且待天晴飽讀書比屋渠渠不
須數

太行歌送丁分教之襄陵

太行之山何崔嵬，鐵崖翠壁萬仞中。天開其勢北來，
吾不知其幾萬里。但見橫亘遼磧，包括秦晉斗起中。
原之地何壯哉！往年吾嘗陟其頂，四顧山如培塿，樹
如苔。黃河一線遙遙下，砥石奔流直到東海不復迴。
此時英風浩然洒六合，便欲歷覽天上金銀臺。其中
羊腸九折走峻坂，摧輪怪石硃礮磊落而成堆。太行
之高且險也如此，子今遠行令人興難裁。倘到昔所
登覽最高處，為我歌此一曲還徘徊。西望襄陵迢迢
祇幾驛，驅車徑須往渡清汾隈。願子居易畏險慎厥
守，始終永保令譽慰我相思懷。

永和雙山歌

永和四境千萬山，雙山之勢尤巔峴。兩峰對峙若天
闕，中有一境通人寰。南峰突兀半空裏，連岫峨峨方
竝起。蒼松古木何蕭森，朔風搜攪鳴不已。北峰形狀
尤奇瑰，怪石刻鏤樓與臺。上有雲屏立霄漢，隔礙星
斗迴。風雷我來登覽值，冬暮攀緣石磴到。高處滄瀛
碣石覺東傾，弱水崑崙在西顧。俯瞰纍纍岡阜多，巨
壑無底如盤渦。遠近幽深杳難測，寒雲冷霧紛盪摩。
因思未闢天與地，頑洞無涯惟水氣。輕陽一隙漸飄

浮大塊無邊遂疑滯波濤蕩漾成高低剛為金石柔
土泥此山想得陽之極層巒削出天之西獨恨古來
壯遊者足迹不到茲山下遂令奇絕委幽窮無由題
品繼風雅我才雖非作者流愛此欲去還夷猶摩娑
石壁寫長句千古當與山同留

鳳凰臺歌次虛菴韻

吾聞鳳鳥不與凡禽棲隆周之時曾集豐鎬西鏘然
一鳴向人世喧啾百鳥不敢爭與啼昔有名臣黃霸
生漢世治民之才迥與時流異潁川出守曾幾何休
風數感靈禽至靈禽文彩明山川和音噦噦聞中天
遂築高臺表神異臺空鳳去餘千年只今壞埽纔數
尺野鳥紛紛競來集簡冊空存紀瑞年荆榛不復快
覩迹我來跋馬登高丘荒臺已遠猶回頭為憶循良
心耿耿緬懷瑞物情悠悠鳳臺鳳臺重披訪往事何
須空快悵方今

聖明治理登俊良會見一朝飛去青雲上

舟中苦熱

大江千里流炎日暑氣波光互蒸濕火雲壓風空不
來舟中苦熱何太劇坐睡昏昏汗雨流對食欲餐還
復休扣舷直欲發狂叫安得少昊回清秋安得少昊

回清秋一洗煩熱情悠悠

洞庭湖歌

吾觀庖犧龍馬圖五行惟水居其初自從清濁奠高
下山澤通氣無時無荆南之水亦衆矣壯觀惟有巴
陵湖世俗相傳八百里足跡未到空躊躇今秋持節
來南楚舟泊岳陽訪奇古登樓始得肆遐觀萬頃洪
濤際天宇如從東岱窺滄瀛一點仙山隔烟雨長風
歛起層霄間溟渤洶洶增狂瀾轟天揭地急雷鼓排
空炫日堆銀山湏臾風止波濤定涵泳虛空開玉鏡
金鳥飲淵千丈紅白鷗落影一行動行客喜甚無氛
埃連翩大舸爭往來我亦飄然下樓去放舟中流何
快哉蜀江西來半天瀉瀟湘南接蒼梧野一劍橫空
有所之丈夫不作悠悠者洞庭洞庭七澤雄鄒魯昔
有觀瀾翁我今賦此良不苟乃知有本無終窮

沅州春日歌

南州二月春來早綠水青山四縈繞城中何處足春
光御史臺中富花草牕外青梅結子稀門墻桃李爭
晴輝暎日紅綃正縷縷漫空白雪何霏霏芍藥錦苞
猶未啓蘭蓀露葉光泥泥楊柳風槎碧玉絲芭蕉葉
吐青鸞尾苔茵展地萱草長千紅萬紫遙相當竹林

好鳥自鳴寂菜畦蛺蝶殊悠揚生意由來滿天地
點池臺足佳致門清祇覺白晝長庭閑况復遊絲細
靜觀元化深無涯中心默默含春熙願効冰霜達陽
氣普期八表仁風吹

敬軒薛先生文集卷之二

敬軒薛先生文集卷之二
門人關西張鼎校正編輯
鄉後學沁水張銓重校梓

敬軒薛先生文集卷之三

敬軒薛先生文集卷之三
門人關西張鼎校正編輯
鄉後學沁水張銓重校梓

歌

杜鵑行

昔讀古人書知有杜鵑名今泛沅江舡始聞杜鵑聲
杜鵑生子不自哺野老相傳之語如少陵惟有古來
稱望帝變化無端竟茫昧吾意百鳥相推尊亦如蜂
蟻君臣義氣化感物不自由四月五月聲喧啾一聲
未了聲轉急千林萬壑波濤秋遠客扁舟睡難著兩

耳還遭杜鵑聒歸心一夜憶
虞廷鳴鳳時應集阿閣

續杜鵑行

杜鵑變化有無寧復論百鳥之中乃為衆鳥尊以茲
少陵托忠憤再拜謂是古帝魂我來何處聞逸響扁
舟夜泊沅江上林霏拂岸灘風清峽影沉波江月朗
乍遠乍近鳴未休聽之轉急如有求遠客母勞厭惱
聒少陵忠義方難儔

壺頭歌

沅水南來幾千里亂石激濤蹴空起
急梢官舫上峻

岩閑倚驛樓看山水隔江萬疊雲峰稠
一峰平立名壺頭云是伏波駐兵處
至今石室留山陬憶昔炎綱斷如縷
草竊紛然據寰宇寧知田牧隱奇才
揮斥奸庸識真主西征實藉聚米忠
南伐誰比銅柱功中興諸將數籌畧
直與賈鄧爭豪雄老身甘向邊陲歿
誓掃群蠻靜坤軸壺頭一死非無情
天遺英靈鎮南服跳梁小醜胡為哉
竟因遺筭稽顙來雖云未雪薏苡
謗白璧本自無纖埃昔於青史歎高
識今向荒山訪遺迹怒濤猶帶薄伐
聲愁雲似是忠憤積馬侯馬侯真夫
夫大器自與凡材殊廟食勲名幾千
古英風激

我章句徒

驄馬行春歌為陳侍御賦

五百啓運天地清群賢奮翼風雲生
遠邇王度實藉執法明同年才子青雲客
意氣昂昂超等列孤松聳壑見高標一鶚橫
空歎奇絕今年持節辭金臺青驄蹀躞萬里來
乃知霜雪達陽氣馬蹄到處山花開邂逅沅陽話
疇昔昔曾聯步趨文石豸冠已覺疑秋霜繡服還應
絢朝日沅陽憲署情何多連床對榻同吟哦吟哦未已
欲將別索我驄馬行春歌愧我詩才劣韓杜長篇險語急
難就強操紙筆為君題掛一何止於萬漏驄馬驄馬登周行
攬轡直擬清四方發奸凜凜息豺虎洗冤藹藹若回春陽
古來豪俊皆如此陳言雅欲追芳趾相將努力篤忠勤圖取
英聲耀青史

歌風臺歌

素靈夜哭秋郊月漢祖吳鉤三尺血
芒碭雲氣從飛龍咸陽竹帛隨烟滅
獨屈群策驅群雄漢中一旅紅旗東
韓郎對語識成敗董公遮說開天秉
王者之師仁以武諸侯効順力如虎
關河百戰芟群雄垓下一歌散強楚
風塵盪滌天下清萬乘不忘布素情
黃屋

歸來見鄉邑宴飲父老如平生酒酣拔劍高歌起歌
詞激烈振天地雄志深知大業難霸心尚思猛士倚
群兒逐和聲悠揚起舞四顧何慨慷樂極哀來淚沾
臆魂魄千秋思故鄉遂令此邑為湯沐獨承天寵何
優沃四百休運同始終三國遺民想興復至今有臺
泗水濱雄豪一去餘千春壞堦層層積蒼蘚平原漠
漠生黃塵我來正值清秋暮桑柘蕭蕭葉飛雨泗水
南流芒碭高霸業王風復何許徘徊重是古帝郊摩
挲石刻心勞焦俯仰秋天莽空濶杳杳鴻鵠凌風高

昆陽行

策馬從北來南涉沙河渡登岸得平原極目風景暮
暮天落葉何縱橫翻翻亂觸馬足鳴蒼山無數背人
遠前瞻忽及昆陽城城南滎水流城郭英雄事業猶
如昨白水真人在側微謹厚伊豈常情度是時炎運
寒如灰五威使者車奔雷慘慘三精雲霧塞蕭蕭九
縣颼風回真人一怒奮神武手握赤符與義旅昆陽
大戰開天功烏合如林散何許吾想當日嚴殺多洗
兵雷雨何滂沱滎川倒流虎豹伏亂麻屍積山嵯峨
自爾威聲震天地克魁惡黨蒐飄逝夏后周宣果再
興成功磊落光前世悠悠此事千餘年至今父老猶

相傳我來正值太平日戰地盡作桑麻田生平遊覽
好奇特徘徊吊古中腸熱舉鞭一笑寒天高萬里關
河坐超越

襄陽歌

持節過樊城南渡漢江曲漢江遠自嶓冢來遙望真
如鴨頭綠江干樓堞何崢嶸壯哉快觀襄陽城少日
常思一遊覽今韓始遂來經行經行處處多遺跡滿
目蒼然悲思集後人遊似前人情是今人情
鬱鬱峴山翠遥遥鹿門深殘碑人墮羊枯淚隱屠誰
識龐公心龐公一去已千古尚有清風灑寰宇茂林

鳥宿魚潛淵區區劉表馬能取城南習家池池水清
漣漪當日山翁酩酊醉風流未許他人知更尋王粲
宅留井峴山麓銅瓶無復汲深寒蔓草空餘覆幽綠
悠悠往事難具陳高名尚有隆中人師出二表鬼神
泣圖成八陣風雨頻乃知襄樊士風好由來英達何
草草漢水東流峴首高祇因配此名不了方今
明聖坐垂旒百年禮樂登虞周仁恩已滿天地大王
化久浹江漢流江漢遊女心如結士習詩書仰先烈
烏臺使者來作歌期與國風傳不歇

過鹿門山

西來漢水浸山根舟人云此是鹿門峭壁蒼蒼石色
古曲逕杳杳藤蘿昏亂峰幽谷不知數底是龐公栖
隱處含情一嘯江風清雙櫓急搖下灘去

遊沅州城南

迴環綠水流城隍出門一顧心懽怡連林竹樹敲蒼
翠綠江梅柳爭芳菲和風蕩耳沸蕭鼓晴日照水流
旌旗沅湘信美匪吾土中州久客還思歸

寄頡文林侍御

前年掛席趨北斗九月泊舟都門口綉衣人是同鄉
人騎馬江邊問行久龍江驛裏同徘徊呼酒飲我何
壯哉興酣往事真草草願傾東海添樽壘別後倏忽
幾寒暑吳江木落洞庭雨黔巫東望山嵯峨恨不高
飛插翎羽丈夫本是重四方眼底道路如尋常風帆
早晚下吳會仍尋舊約歌慨慷

寄朱侍御歌

吾觀古來磊落大丈夫致身特達自與凡才殊若不
功作霖雨潤枯槁便當手持玉斧清寰區二者都應
不可得大田可稼長川漁生平抱此心耿耿爛讀古
書極馳騁中年濫騎烏府驄幾載蠻荒苦便靜忽聞
按部同官來江山六月霜風回樓舡彈壓湖湘百怪

息憲節蕩拂溪洞雲烟開是時思得懽然一相遇何
意黃鵠東飛燕西去令人凝望佳節過開盡冬梅老
春樹春樹纖纖柔葉多沅江江上浩烟波喜得瑤華
好音信與來獨立東風歌歌成寫寄憑雙鯉心事非
公復誰理會合悠悠自有時還期高議金門裏

黔陽江行歌

黔江轉急勢未已兩岸蒼崖削天起官船雙櫓疾於
飛倏忽雲林過百里生平膽氣尤崛竒三年蠻徼甘
奔馳惡灘險浪不經意白日自保公無私空囊敝篋
一何有滿束古書置前後船牕豁達涵虛明書中得

意寧容口忽憶江山千古長不知何日開鴻龐陰陽
爭勝鬼神急造化不停真宰忙千竒百怪氣參錯輕
飄重墜奠清濁三光宣精四海明五行順序百卉作
有物不名復不凋泯默萬化常超超眼底江山未為
壯大地比是猶毫毛感此人生浪自苦萬事悠悠隨
所與放歌一曲南風來坐對青天兩無語

鶴山小隱

大江之右多竒峰天台遠與羅浮通鶴山蒼蒼在何
許嘉名獨擅東南雄中有隱士好事者作圖遠寄烏
臺下烏臺柱史隱士交持卷索我揮狂毫開圖指點

山佳處峭壁迴巒簇烟樹澗花流出山中春松風掃
遍溪頭路數椽茅屋何蕭然白雲簷宇常周旋讀易
已了嘉遯趣作詩或賦招隱篇此境初從柱史說令
人掩卷想竒絕振衣千仞或可期萬里雲霄坐超越

憶昔行

憶昔年纔十二三老親携我遊西南西南道路蜀山
裏累月不盡經崦岩當時正值春光麗紅紫千林競
妖媚綠蘿覆逕搖溪烟清風掠面送花氣羈懷未解
怯險艱青泥坂滑石磴盤路夾陰崖白日暮梯凌危
棧蒼空寒寒空石壁挿江脚斷痕疑是鬼斧鑿倒懸
古木星斗迷亂灑流泉風雨作憑空一望山疊重烟
溪霧谷相鬱滃積陰絕險足妖恠深叢大野多蛇龍
後有劍閣橫天絕時清關險成虛設關南石龕夜宿
時子規叫落龕前月成都開豁自一川盛夏又泛岷
江船蠻中忽忽幾寒暑新正乃有中州旋骨肉相隨
千萬里回首舊遊如夢裏三十年來白髮生坐想雙
親淚如水

井陘懷古

并州東下幾百里太行古道石磊磊山開忽見一掌
平中有孤城入雲起憶昔白蛇中斷時韓侯魯此驅

雄師伐鼓安安出天險趙壁指顧皆紅旗雄豪破滅
如反掌遂使英聲走颺響至今泝水向東流戰骨成
塵惟草莽侯也之功良已多五湖其負扁舟何行人
莫問井陘事悲風慘澹來山阿

驄馬行春為張侍御賦

禹跡既萬里天關亦九重明明日月理無不照幽情
隱恤孰使之通維時新春二三月處處熙陽達米雪
繡衣驄馬者誰子倏自青冥下霜鉞芳草萋驄馬嘶
遙遙行部東還西攬轡貪觀紅樹好揮鞭不覺蒼山
低馬蹄遍征路蔀屋春華露郡邑蜚聲吏不驕梟獍
屏迹民安作驄馬來風雲開回寒作煖蒙 帝力萬
物吐氣何熙熙還鑣入覲

天顏喜齊言海宇清如水年年領節君莫違長播仁
風遍文軌

天馬歌

天馬西極來一日行千里雙睛懸鏡秋水清四蹄削
鐵長風起骨骼既已異性情真復殊饑食玄圃千頃
禾渴飲天源萬斛珠天馬不易得世亦不易識奮身
振鬣何昂藏有時慙向駑駘立駑駘謂天馬神駿徒
為爾我水一斗休我芻一束止天馬朝朝恐渴饑河

清伯樂馬足侯天馬為之笑飽逸寧足誇一夕長鳴
得天路顧爾連蹇泥中蛙
不守素卷為杜侍御題
吾聞達士安所存寥寥此道誰當尊達則夔龍拜金
闕退則回憲安蓬門文采風流少陵客少小讀書慕
前哲布衣豸服了不殊藜藿膏梁同一節盤盂几杖
古有銘華軒更揭守素名朝看暮看志激烈或出或
處心和平我亦平生絕馳慕感君意氣還同趣相期
携手登崑崙共論希夷更深處

齊都歌

大龍倒捲歸虛壑小龍騰身向天末吐吞雲氣相接
連萬里分明露頭角陽精變化未覺難生靈走電白
晝寒相顧為霖莫相誤收功竝入玄冥間

齊都歌

偶把漁竿來渭水諸侯八百從如蟻洗兵一雨天下
清興王事業應難比茅土之封東土侯奄有青濟都
營丘千乘龍旂照滄海百層雉堞臨淄流淄流拂曙
歌鍾起人物喧闐隘都市黃金白壁酬君公文馬雕
軒觀天子前朝後市何輝光歌臺舞榭遙相望長劔
危冠盛臯虎珠簾繡幕圍姬姜伯業相傳僅千載寧

驄馬曉辭萊子國北上高岡俯遼碣遼碣萬里天風
寒山溪二月凌漸結空濛極目春無邊春濤洶洶搖
春煙還從絕嶺下長坂高城忽起滄溟前滄溟倒浸
紅樓影通衢豁達塵埃靜已應持節是明時况復觀
風得住境天開海闊霜臺高霜臺遠思何飄飄巨鰲
戴山真浪語大方見笑非虛謠乾坤俯仰高歌起有
物無名大莫比瀛海茫茫未足誇真是人間一泓水

望海歌

我生足迹半天下揭來持節臨東夏萬里滄溟入壯
觀洞庭彭蠡足驚詫三韓之西日本東玄冥少昊迴
祝融歸墟尾閭杳難測清江碧漢來無窮碣石依稀
望中小天台不斷連山繞烟波明滅散群鷗雲水空
青浮衆島扶棊漸覺明朝暎還從海底昇金盆太陰
滅盡清輝發羲和穩駕波無痕有時颶母逞神武馮
夷擊鼓百怪舞白浪峩峩摧雪山黑霧茫茫漲天宇
三山六鰲安在哉祖龍已去劉郎來樓船不復返秦
使雲帆更欲尋蓬萊雉豪千古俱淪沒唯有潮聲尚
如昨從誰海上論盈消獨倚蒼山看寥廓

東平行臺十五栢

行臺臺上十五栢一一皆抱梁棟姿自應生長得元

氣更當培植需良期孔明廟前今在否才大空聞少
陵語何如此木生中原萬牛不用可立取

送王秀才省兄歸京師

海右傳聞此亭古亭中送客豪英聚清風入座華筵
開流霞滿眼金杯舉是時霜落天宇高岱宗南望干
雲霄况復齊川走滄海三山恍惚連六鰲山奇海壯
環名邑落落高懷感今昔琬琰難酬北海詞風兩寧
如少陵筆想當促膝茲亭中飄飄逸氣凌長空至今
草木生光彩名將山水傳無窮皇明文運超唐李鳴
鳳高岡鳴不已王君之府玉堂仙清秩仍兼典三禮

難兄早擢賢良科內臺執法平不頗竭來海岱振風
紀王君柰此想思何鴻鴈聯翩暫相接又是離亭動
行色蕭疎荷芰颭秋波凌亂桑榆下霜葉王君王君
我所奇不須懷古傷分離但願墳箎迭相應一門清
譽流無期

瑯琊行

正統六年夏五月予奉

勅過諸城其地即古瑯琊郡追念古迹湮沒
而喜今之民物寧熙是皆

國家深仁厚澤培養休息之所致因賦瑯琊

行以紀之

秦祖瑯琊臺坡老超然臺兩臺千古兩寂寞但見參
差雲木山崔嵬我行正值四海昇平日千里連城萬
家邑烽堠花開火不驚林園麥秀雉爭集茫茫一氣
天無私山川民物皆欣熙三事小臣効精白九重
聖主方無為但願此景垂過億萬載天為城郭地為
海人間無處不春臺蘇刻秦碑真戲乃

山水圖為趙給事賦

黃門給事好事者一福江山誰為寫雲霧波濤滿眼
生坐覺襟懷自瀟洒衡廬倚疊岷峨高洞庭彭蠡洲
渚交叉疑雪消蜀水來黃牛白馬增春濤細看清濁
分天地地脉山形宛相際良工妙奪造化工白浪青
林走雲氣綠江細路古木齊耳畔似聞幽鳥啼倚岸
扁舟久將濟入雲茅屋誰同栖江草山花不知數採
芳未是良辰暮英靈不聞澗谷歌仁智自諳水山趣
憶我昔遊天下時跋涉險阻探清竒何如此圖不出
戶勝槩一覽無所遺

送趙大參之浙江

浙右新叅拜天寵趙君籍籍聲名重曉辭仙仗出都
門驛騶塞道香塵擁交遊送別情何多離筵正值東

風和山光入坐水侵席柳條弄色花滿柯花前罷酒
官橋遠潞水開帆驛程轉九重金闕尚馳情千里
吳山行在眼吳山自昔稱繁華居民比屋過萬家西
湖烟淨拭明鏡海門潮起翻銀沙復有孤山號清境
清溪淺露疎梅影處士不作封禪書節與孤山共高
聳大藩形勝甲南東好山不盡湖江重薇垣軒豁挹
清氣使符出入宣皇風皇風正是全勝日聖明側席
求賢急方期禮樂過百王直使仁恩涵八極趙君好
體軒堯心嘉禾莫使蟲蠹侵旬宣他日有成績策勛
還作商家霖

送盧知縣致仕歸金華

高秋九月都門道冠蓋光輝耀晴昊離筵觴酌送者
誰花縣郎官乞身早郎官自是青雲姿飛騰况值
明盛時著書東閣見才俊之官南國憐英奇英奇未
了哦松興鸚薦薦陞官播佳政單父橫琴今幾年故里
懸車想三逕三逕乃在金華阿金華山水名且多繞
戶清溪漱寒玉當窻秀嶺橫烟蘿到家盡得溪山趣
交友過從樂相語為言壯仕老歸來此是
天恩最深處

題羅侍御仙舟出峽圖

御史新圖妙難比畫船秋泛瞿塘水瞿塘水束三峽
深兩岸削鐵虛無裏虛無難辨峯頂高白雲林壑生
虛濤陽臺何處笑荒幻陣圖回首思雄豪雄豪一去
幾千載壯志何須增感慨自知豸角邪可觸不為須
聲淚空洒東行更飽湖海觀繡衣不日朝金鑾覽君
此畫動清興扁舟便欲相追攀

題羅御史驄馬行春圖

青驄蹀躞長風起蜀道南來八千里攬轡不覺群山
高劔閣峨眉平若水行邊正值韶光濃千岩萬壑花
爭紅晴霄麗日照旌節芳郊草軟搖玲瓏三川玉斧
巡將遍父老懽傳喜相見瘴厲都從淑氣消陰寒總
逐陽春變陽春本自天上來行春此日何壯哉還從
畫圖識神駿迴鞭却上黃金臺

張忠定公祠

乖崖自是竒人物兩迴走馬定西蜀纔驚錦水雲飛
揚坐見雪山峰突兀龍劍破匣搖寒芒斬艾荆芥驅
天狼父老但知歌舞樂黎庶不覺科徵忙鐵心一念
真能止侍女三年猶處子乃知金石誠可通遂使西
人信如此功成佛袖歸幾年年深惠化猶相傳蛟龍
上天風雨急聲名垂世日月懸至今西人感公德牲

醕年年進公室，迴頭却笑鄙猥徒。身名泯泯無遺跡，
八言寄題廣漢張魏公讀書岩。思公醉對巖巖
廣漢之山甲西蜀，聞有石岩在山麓。想當英傑未遇
時，携書獨向岩間讀。岩間日月閑且長，遠從虞夏窺
黃唐。幽探造化鬼神變，明察典禮人道常。古書遍讀
飽經濟，一朝適與風雲際。社稷頻將赤手扶，砥柱不
逐洪波逝。金輪腥濁乾與坤，冥冥九字皆妖氛。要除
黠獠正人極，誓驅貔虎清中原。其如諛口增萋斐，一
斤南荒垂二紀。容光雖荷天開明，孤忠竟與時已矣。
俯仰于今幾萬秋，名將江漢無停流。思公招公公不
起，遙想寒岩添我愁。

西蜀歌

天險不可升，地險猶可登。西蜀之山盤亘華夷幾萬
里，層巒疊嶂危峰峭壁何峻嶒。西嶺峨峨太古雪，巫
山蒼蒼曉雲白。北有劍閣中天削，出石門高南有峨
眉。凌空竇緣鳥道窄，群山合沓險遠不可窮。危梯側
逕無不相連通，榎楠松柏古木不知數。攢巒架壑陰
森翁鬱起烟霧，野花澗草亂雜難具名。紛葩蒙茸齊
霑天雨露，熊羆虎豹徠狝相與為群。曹幽禽怪鳥雄
飛雌，遶各以時鳴號。蜀山草木鳥獸之環竒也如此。

登高一望但見千里百里峰巒湧翠如海濤中有長
江橫界井絡域發源岷麓東注滄溟無底谷深山幽
壑溪澗千萬支穿林絡石竟與岷江共聯屬蜀水行
地山入雲東連吳會西崑崙梁州舊是禹跡九州地
誰言自古隔絕不與通中原憶我總角年曾來到西
川惟時記一不識百白頭迴想空茫然前年 丹詔
下田里布衣走馬見 天子擢官便作大理丞持節
重到三川裏三川山水得縱觀睨重險輕狂瀾不
為三峽猿鳴墮清淚不為五夜鶡啼慘旅顏老讀古
書破萬卷物理深深頗窺見大莫大於天無際眼中

山水足驚羨慨此悠悠險隘區一分一合千古餘奸
雄割據奴輩介干戈盜弄鼠子如獨想南陽老諸葛
三顧茅廬魚水合復漢功留二表中出師星向五丈
落至今廟食錦水頭討賊忠義垂千秋下視紛紛草
竊盜名字泯沒何異狐鼠漸腐埋山丘只今

天開明運四海為家日岷江安流道途夷坦險阻失
我作歌詞紀載混一全盛時期與江山永永傳無極

題劉都憲山水圖

誰寫新圖妙難比疊嶂連峯向天起逼人已覺爽氣
清入眼渾疑暮光紫緣山細路分高低雲林遠近何

參差晴崖杲杲風日白陰壑慘慘雷雨迷沙水微茫
繞山脚半空飛瀑銀河落山光水色交清輝世外塵
氛盡消豁憶我壯遊天地中名山歷覽千萬重良工
巧奪真宰意雲氣恍與諸山通劉侯家在江南住正
在此圖好山處開門只見金芙蓉散倚青霄不知數
侯今官已都憲臺家山尚自縈高懷匡時未許賦歸
去觀圖且喜清風來

題鄭侍郎蓮鷺圖

高堂忽見華山頂十丈仙花開玉井新梢出水藕橫
船圓葉當空蓋歌影紛披花葉相交加綠雲片片連
紅霞疑是瑤池宴仙子酒酣肌理無纖瑕何處紛然
下群鷺佇立相呼復相顧六足聯拳方比翼一喙低
遲還獨步啣魚仰視空外來故知兩意無嫌猜參差
九鷺態度別紅蓮香裏同徘徊徘徊毛羽勝霜雪散
布蒼烟幾點白渾如野鶴出塵埃迴視凡禽迥殊絕
匪獨九鷺絜有光就中飲啄性亦常不比饑鳶得腐
鼠仰首却嚇孤鳳凰無限鷓鴣與鷹隼爪觜銛利性
貪忍何如此鷺純且真不搏不擊意深穩誰哉巧奪
造化工花鳥幻出丹青中潔白真堪比君子還歌振
鷺鳴西雝

題角鷹圖

疑是楚公戴角鷹寫出神氣何稜稜
律如熊虎一心猛快若風火六翮輕
曠野秋高草蕭瑟百萬雄師大
獮獵合圍已見三面齊翻鞞似覺
千里窄縱橫搏擊鳥獸群風毛雨
血何紛紛雲裏鷓鴣尚須避草中
狐兔寧復論罷獵歸來立高樹似
聽風颭欲飛去安得真骨殄鴟梟
長見鸞鳳在雲路

畫梅歌為朱大理題

天地有清氣鍾人亦鍾物阿誰寫出
江南春彷彿湖山見佳木老幹何
槎牙柔條亦森羅踈枝天矯相交

加花神幻出連空葩長風吹落天家
雪萬葢千枝曉爭白瑤臺仙子舞
衣飄姑射神人珮珠結冰玉之姿
孰與論生來不受半點塵野草閑
花真瑣屑麝桃俗李徒紛紜物意
有如此人間真太奇庾嶺何須訪
消息孤山不用尋橫枝但願江山
處處結真味共與鹽齏調六氣
星騎箕尾若可追編書垂譽過千
世

山水圖歌為蒲守徐孚題

誰寫雲山與烟水爽氣清風盈幅
起想當解衣盤礴時坐驅造化入
筆底湏臾削出金芙蓉奔湍駭浪
爭潮宗元氣直穿古石裂懸流疑
與銀河通青林遠近

不知數林內山房啓晴戶時清似有招隱歌地偏不
見採芝處我昔持節天下遊東窮海岱西梁州忽見
斯圖憶所歷江山清思何悠悠河東之守好奇者特
送圖來索題寫自知老大筆力微掛一漏萬語非假
強裁長句卷還時坐中尚覺留清颺仁知高懷在山
水賢守玩此應得之

送鄭侍郎歸省

吾聞侍郎之父御史祖閱世如今八十五飄蕭鶴髮
未龍鍾崦岩俊骨自竒古侍郎蚤歲簪筆趨螭頭
五朝出入遷擢寵渥稠往年龍勅推恩出天府前年

鸞誥封秩來廬州老親榮貴重重真罕比銀章金帶
照耀鄉閭裏侍郎官署居南京思親只隔長江水今
春乃上陳情歸省章報可丹誥飛下五雲鄉試問此
時拜恩感恩意東流之水與之誰短長便理南歸舊
囊橐沙頭潮退盡舫閣京華相送盡公卿冠蓋追隨
出郊郭是時正值春光明媚春氣和柳條弄色流鶯
歌江草萋萋迷含烟競駐紫騮馬江花凌亂隨風飛拂
金叵羅酒盡潮來掛征席想到家鄉祗幾日升堂拜
舞多弟昆堂前羅列兒與孫歌曲庭闈沸絲竹賓朋
門巷如雲屯大啓華筵斟壽酒懽聲喜氣傾前後齊

言靈椿不老南山高共願親齡與之同悠久

送安城戴勿諒歸江西

戴生大司成之姪壻經授春秋究凡例春王正月大
統明西狩獲麟筆削既二百四十二年指掌中屬辭
比事須融通謹嚴獨得昌黎老大義特造伊川翁經
世之書真大典魚魯何如尚訛舛胸中要自有權衡
筆下何須苦裁剪戴生業此凡幾年一朝歸興何翩
然連環屢夢老親面蘭橈便理西江船江頭載酒紛
紛來送別半是青雲之器橋門客離情草草何足云
英論滔滔殊未竭時維九月天宇涼洞庭木落南鴈
翔丹楓耀日染霜葉白雲映水搖秋光祖筵酒盡掛
征席千里鄉闈祇幾日升堂拜舞稱壽觴倍覺双親
喜盈溢雙親之喜將何如有子一別三年餘但得經
書載子腹絕勝甘旨左右趨戴生起拜奉親志讀書
須學聖賢事古來聲利等浮雲直自麟經遡洙泗

春江送別爲陳侍御兄賦

有客有客官內臺難兄千里拏舟來典衣沽酒共歡
咲狂歌放飲懷抱開燈前幾時同聚首又復忽忽各
分手借問歸期何太忙荅云慈母相思久交遊出祖
春江邊春江楊柳含青烟維舟蕩漾碧波裏傾觴歛

灑飛花前玉瓶酒盡征帆發咫尺風濤分楚越沙上
鵲鴿相背飛雲間鴻鴈分行別莫云去住難為言誰
似君家賢弟昆難弟致身位方達難兄歸養名何尊
想到淮南春未老慈親手弄連環好稱觴正值佳節
和戲綵偏宜晴日皎切切丁丁母子情為言官况清
如水會有鸞章下霄漢褒封永作家門榮

送虞憲使考滿之京

山東憲使何昂藏鐵心古貌眉髮蒼出入四朝荷
天寵操持一節飛秋霜海岱茫茫幾千里十年監部
平如米只今報政趨神京僚庶追攀情不已薰風揚

柳城西亭綺筵別酒傾銀瓶一舉十觴勸公飲氣酣
感我千古情千古之情向公道要使蒼生樂熙皞內
臺黃閣正需賢此去嚴程到須早

醉吟樓歌為劉僉憲父賦

醉吟之樓高且雄誰其作之醉吟翁翁心豁落真宰
同作樓直欲凌蒼空危梯縹緲疊撐柱層軒洞達相
開通白雲片片宿梁棟青山隱隱當簾櫳長夏絕超
爽靈風洒清響秋蟾散影九萬里曉雪懸光一千丈
四時風景佳翁來日登賞賞心苦未足呼酒滌塵想
一觴一咏自風流興酣萬物良悠悠傲睨五岳衆山

小吞吐七澤三江秋有時醉倚闌干望八極便欲排
風御氣仍丹丘却思李杜文章伯只今已作神遊客
舉杯且復一招之招之共飲樓頭月月光入口清心
魂唾珠洒作澄江雪澄江雪何茫茫瑤翻玉湧蛟龍
翔是時翁與二子相頡頏搜括百怪神鬼藏陶鎔萬
象造化忙乃知醉吟樓不讓采石江邊亭浣花溪上
莊

遇知行簡陳廣文

豈不聞北海鵬扶搖一夕起搏擊九萬程又不見渥
洼駒朝飲東海水暮宿崑崙墟古來磊落奇男子變
化騰驥亦如此英風激烈干雲霄偉績軒轟冠青史
我昔年少天下遊大河南北西梁州望遠將登岱岳
頂觀瀾欲泛溟渤流爾來戰藝梁園日秋月離離桂
花實更隨春水到龍門一躍風濤生霹靂中間斂翼
就閑居我冠且復歌唐虞半載悠悠客京索千錢僦
得城南廬城南之廬絕蕭洒開門直見南山下南山
朝青暮亦青人情誰似山光者陳夫子儒之豪早年
獨步亨衢高雄文應不讓班馬清詞真可追風騷籍
籍才名三十載到處菁莪秀而藹春生杖屨樂薰陶
霜吼金鍾共傾駭衆人視我同衆人先生視我情何

真乃悟知音古來少伯牙獨與鍾期親先生賸注樽
中綠我為先生歌一曲老天生才既有需豈向塵埃
長碌碌一歌既竟還復歌歌長此意將如何殘冬便
須終日酩酊醉春來喜見萬里風雲多

題王司訓汶陽親舍圖

先生累葉居鄒魯禮樂詩書紹先祖夫子遺風飽已
聞杏壇遺跡頻經覩一自賓興上玉京便拜除書
綰絲組官在中州千里餘回首鄉關路脩阻為因甘
旨缺晨昏故遣良工寫鄉土淡靄初分嶺上村輕烟
乍點天邊樹洙泗微茫泗不流龜蒙岌岌業黯將兩憑

軒忽若無丹青汶水之陽見庭宇花間一鳥窺簾櫳
竹裏兒童隨杖屨靜聽如聞琴瑟鳴細看似覺斑斕
舞先生乃是純孝人思親對此融心神錦衣有日遂
榮養壽觴更祝如大椿吾聞昔日唐忠臣大行跋馬
高嶙峋白雲孤飛繞親舍望之不覺涕零巾至今香
名滿人耳先生豈不追芳塵願將此圖莫輕擲子孫
永作傳家珍

留別王大尹

憶昔年少登公堂公堂開宴羅笙簧紅燭傳觴鸚鵡
煖錦箋落筆蛟龍翔賢侯愛客情無已留連夜宿重

簾裏香消古鼎語未闌月滿雕梁眠未起中間契闊
十年餘千里關山恨索居何意今朝復相見烹羊醜
酒為懽娛愧我馬蹄隨計吏朔風又捲河梁袂握手
難忘父母邦銘心佩感賢侯義賢侯之義孰與儔冰
壺玉鑑涵清秋報政行將覲明主春花相約鳳池
頭

題醉仙圖

畫圖忽見瑤池仙排風馭氣今幾年弱水蓬壺恣往
還滄海見說成桑田流霞之酒如長川偶來醉倒東
風前長松落落芝芊綿群仙倚側坐與眠壺旣為之
傾瓢亦為之顛沉冥不管山花妍拂袖涼飈神凜然
共騎黃鶴凌蒼天

贈同年

吾聞洞庭之水幾千里巨浸茫茫接南紀蛟龍夜舞
風濤寒鷗鳥晴浮鏡光紫岳陽之樓高且雄玄冥北
牖南祝融媧皇悞落補天石君山一點玻璃中咄此
湖山兩竒絕孕秀儲精此其穴應有賢俊生乎間豈
獨崧高產英傑我昔年少天下遊只今三十來神州
同時射策揔豪邁翩如彩鳳翔高丘有客昂歲好眉
宇家住巴陵幾今古已應秀氣鍾湖山更覺詞華紹

先祖偶騎鯨背遊赤霄赤霄仙子爭相招想當沉醉
碧桃下一花吹落春江潮自爾棲神玄圃側煉氣餐
霞學胎息一朝九轉就還丹羽化千人萬人識清水
芙蓉吐異葩蘭苕翡翠相交加珊瑚色明海底樹雲
錦光吐空中花紫府之名照丹籙鈞天細聽蕭韶曲
欣逢明聖登俊良喜遇昇平調玉燭馬蹄共踏金臺
春與君義氣殊相親志節功名須努力賡歌願作虞
廷臣

金臺春意圖為夏進士賦

西山千仞插天碧東海排空浪頭白山雄海壯擁神
京中有金臺臨紫陌臺高迢遞絕塵埃九天星斗羅
三台臺前一夜東風起吹得皇都花柳開花枝杲杲
明朝旭柳色依依裊輕綠九衢車馬睹晴輝萬井笙
歌連曙燭有客磊落豐城人寶劍出匣光芒新兩度
青雲不得意今年一舉超常倫金臺駘蕩春光好對
策彤庭漏聲曉寶殿臚傳瑞氣多天門榜放祥雲繞
錫宴南宮春晝遲錦袍不管杯淋漓醉向和風滿歸
路紫騮蹀躞爭驕嘶綺樓翠牖出雲幕粉黛朱顏擁
芍藥傾城人看綠衣郎意氣昂昂動寥廓幸逢明聖
坐垂旒聯翩彩鳳鳴高丘成名祗向鴈塔寫放歌不

作平康遊金臺春色看未已又沐
天恩還故里盡將此意入丹青期與乾坤傳不毀

送劉侍御

青驄曉嘶春日明銀鞍穩被珂玉鳴
榮乃是烏臺柱史朝神京故鄉之山鬱崢嶸綠溪白石蒲芽生交朋相送難為情
大槌鼉鼓吹匏笙四筵列坐皆豪英高談直使鬼膽驚醉來不覺金壘傾起舞音氣殊縱橫我歌一曲送君行丈夫立志當軒轟古來多少影華纓唯有忠義留芳名豈無鐵面寒亦有攬轡清願君追取二子炯炯之精誠仰酬盛世開

隆平

苦雨

涼風颯颯雨聲急出門跬步苦沾濕山城拂地雲霧深河渚交流潢潦溢田夫野婦坐嘆息園中有棗不可食况復離離禾黍垂及時不得收穫力一年百事望秋成秋成柰此淫雨積誰哉為我誅雲師宛見青天行白日男亦欣欣女亦懽有衣有食安家室

郊遊

客居煩聒毒我腸偶騎欵段登周行西行三里渡小水北上百步臨高岡遠近人家翳喬木依稀郵舍圍

垂楊是時隴麥半乾槁南風起浪日色黃所遇林桑
已空兀誰家婦女猶提筐唯南有山接嵩少雲門開
闔峰低昂清回爽氣徹心目便覺塵慮都消忘回鞭
窈窕歷溪谷野花野草供幽香殼蝸垤蟻各生遂潛
鱗飛鳥咸徜徉東折縈紆歷平坂縱觀大化窮毫芒
乃悟群生隱無極始知一氣包鴻荒此意悠悠真罕
識令人酷憶點也狂緩轡歸來日已夕滿懷風月天
茫茫

故鎮行

北山峯崔嵬天碧山前古境烟霞集兩街老木風颼
颼幾道寒泉聲瀝瀝溝塍繚繞禾麥稠椒材果實被
道周人家門巷甚蕭洒村園水石殊清幽西邊梵宇
臨深谷俯視溪田藹新綠鍾閣風雲入壯懷佛殿金
銀炫塵目斷碑蒼蘚還摩挲細看歲月良已多趙宋
金元迭興構黃童白叟爭奔波誇雄競麗猶未已衰
歇幾何還又起大道由來甚坦夷何不歸斯而舍彼
親朋導我村北行叢祠戶牖塗丹青龍堂鬼物極雄
怪土祠洞府何幽冥還復崎嶇歷西澗寒水競涉波
凌亂高柳啾啾栖暮禽平蕪渺渺語飛燕嗟哉此境
良亦稀遊覽未畢情依依念我昔年走天下每逢山

水娛清輝况兹故里好林壑有田可耕薪可斫待余
他日重歸來擬卜山居尋舊約

西磴行

偶來與客遊山前地幽便覺人境偏路入青林幾縈
曲濃陰不斷風泠然灑灑清泉來遠谷紺色寒聲瑩
心目石梁急瀉跳明珠草岸平流浸青綠北行更欲
尋泉源山門蓄霧勢吐吞兩峯秀出半空裏錦屏屹
立當中尊復憇山腰小琳館洞戶雲扃殊宛轉袖拂
塵埃讀古碑茶餘苦乏青精飯歸來白日天未中回
頭尚愛千雲峰更待秋初稍涼冷還登絕頂窺鴻濛

峽石山行

古道黃泥沒車轂峻坂迢迢客行苦別尋細路出山
椒俯瞰群峰如累土山楸怪石何崦岩小大累累兒
逐母忽驚耳畔過狂飈老木如人自掀舞陰陰空谷
蹄饑猿慘慘深林嘯猛虎時時一顧破羈顏秋葉秋
花解媚媼霜林色重紅欲然露菊香寒寂無語日暮
嶠陵風雨來千山萬谷堆雲霧回視人寰不知處恍
疑馭氣遊蓬萊

新安行贈王廣文

西通嶠沔東洛陽澗流曲折波浪浪連峰壘巘互低

昂溪橋野店遙相望函關開豁地一方新安老樹浮
高隍山迴川合鬱蒼蒼儲精孕秀不可當錢君若水
慎行藏急流勇退何徜徉韓侯擒虎智力強高勳亦
可銘太常其餘豪傑皆軒藏弱毫未易俱談揚王喬
古洞南山陽世傳鐵斧殊荒唐洪鑪烈焰徒煌煌百
煉不改纖毫鋼古來雷斧墜穹皇陰陽搏結成鋒鏗
鐵斧無乃類此行胡為末俗相驚惶我行愛此山水
鄉往來屢宿芹蘋堂芹蘋廣文情慨慷時能取樂行
華觴諸生羅列芝蘭香爭持斗酒澆我腸醉來意氣
何揚揚為之放筆掃粃糠掇拾故迹百十七志頗勝燕

石為琳琅欲行不行意徊徨明朝別思俱茫茫

寄溫縣江司訓

君住江南我江北關河千里萬里隔一朝振翮起翔
翔同逐春風遊紫陌是時英俊天下來南宮角藝何
壯哉豈意主司濫收采繆將寸木升崇臺君持木鐸
向溫邑曾問士風解愁寐我亦拜 恩歸讀書却抵
滎陽問家室滎陽溫邑隔大河相尋一葦曾經過嚴
親今歲官河內往來擾擾如奔波愛君特達好心事
一回相見一歡恣夏館清談移晷陰秋齋共宿發幽
思有時酌我金屈卮我還答以二鳥詩醉來意氣覺

奔放生平肝膽何崛竒近日分携隔風雨羈懷落落
向誰語行將跨馬過君家寄聲為釀新秋黍

送蕭都憲歸盤窩歌并序

盤窩者都憲蕭君所營別墅之地名也蕭君江西
龍泉人其所居里曰南園去南園十餘里有山水
林木峭列迴環蒼鬱其間人以其地僻遠而莫之
顧蕭君自登進士為僉憲時以省祭歸鄉里因遊
其地登高而望入溪而步俯仰四顧知其勝絕可
為退休之所乃命童僕芟其草萊而佳樹列疏其
壅滯而泉流清則山若增而高地若闢而廣水若
積而深而凡雲光霞彩嘉花美木千狀萬態猷秀
爭竒於前觀玩之久意若忘歸蕭君以古有盤谷
以斯地較之未知其為孰勝因名之曰盤窩乃結
茅以避風雨遂記其事而目為十景詩以詠之今
年冬蕭君以病得賜告之恩將南歸尋所謂盤
窩者朝之大夫咸為詩歌以贈之余亦賦蕭都憲
歸盤窩歌以送其行云

古揚州之域今大江之西名山名水相望其間罕與
之齊龍泉乃在山水最佳處盤窩直與盤谷爭勝足
以成幽棲吾友蕭君生其邑鍾秀精英抱高識神駿

早掣飛電蹤大鵬快展扶搖翼天上迢迢十二樓鳴
佩早與群仙遊東俯扶桑枝西瞰崑崙丘珊瑚文彩
滄瀛流吳鉤光射瀚海頭聲譽喧喧鬢未改賜歸倍
覺天恩大蕭蕭行李出都城漠漠雲帆掛淮海長
江西上知幾程家山次第來相迎盤窩林嶺秀盤窩
水石清東潭西障迭隱見馬山龍洞相紆縈離口橫
波秋色冷朝帽之峰露高頂平林歸翼晚來稀遠浦
漁舟歌韻迴雲陂春牧散無邊高野秋禾成萬井盤
窩之景何其多蕭君柰此盤窩何或時採其山或來
釣其波松根茯苓自可斲而煮松花崖蜜亦可調而
和山間茅屋極蕭洒嵐靄氤氳清水瀉靜時翫易窺
見天地心閑日彈琴并與親朋話盤窩之樂難具陳
應知道卷堪怡神但恐勿樂有喜鶴書飛來自天上
東山謝老未許獨樂忘生民

